



SIARAN MEDIA

MPS PBT TERAWAL ANJUR MAJLIS IKRAR BEBAS RASUAH BERSAMA KONTRAKTOR LANTIKAN

Sebagai tanda komitmen MPS dalam usaha membanteras jenayah rasuah, salah guna kuasa dan penyelewengan, satu Program Taklimat dan Dialog Antirasuah dalam Perolehan Kerajaan dan Majlis Ikrar Bebas Rasuah (IBR) oleh Kontraktor Lantikan MPS bersama SPRM Negeri Selangor telah diadakan pada 23 Mei 2023 bertempat di Dewan Beringin, Taman Seri Gombak.

Taklimat dan Sesi Dialog Antirasuah yang bertajuk “Perangi Rasuah, Tanggungjawab Bersama” ini telah disampaikan oleh Tuan PKPj. Ridzuan bin Abd Malek, Timbalan Pengarah (Pencegahan) SPRM Negeri Selangor. Taklimat ini menyentuh kefahaman berkenaan isu rasuah dan pendedahan tentang kesalahan-kesalahan yang mungkin berlaku dalam pengendalian proses perolehan serta akibatnya. Seramai 150 orang wakil kontraktor lantikan MPS telah menghadiri program yang julung-julung kali diadakan ini.

Di akhir program, telah diadakan Sesi Lafaz Ikrar Bebas Rasuah (IBR) oleh Kontraktor lantikan MPS yang diketuai oleh Tuan Lt. Kol. (B) Azwan bin Maat, Presiden Persatuan Kontraktor Melayu Malaysia (PKMM) Daerah Gombak. Acara disusuli dengan sesi tandatangan Ikrar Bebas Rasuah (IBR) yang telah disempurnakan oleh Tuan Lt. Kol. (B) Azwan bin Maat dengan disaksikan oleh YBhg. Dato' Haji Alias bin Salim, Pengarah SPRM Negeri Selangor bersama-sama Tuan PKPj. Ridzuan bin Abd Malek; Dato' Mohd Yazid bin Sairi, Yang Dipertua MPS; dan Tuan Adi Faizal bin Ahmad Tarmizi, Timbalan Yang Dipertua MPS. Tayangan montaj Ikrar Bebas Rasuah oleh pihak SPRM juga salah satu pengisian semasa program ini berlangsung.

Dalam ucapan Dato' YDP, beliau turut menzahirkan penghargaan dan ucapan tahniah kepada para peserta atas komitmen mereka dalam menyahut cabaran kerajaan bagi menjaga nilai-nilai ketelusan dalam setiap urusan kerajaan yang dilaksanakan.

Penglibatan peserta yang sangat menggalakkan dalam program ini memperlihatkan kesungguhan dalam usaha mencegah segala bentuk jenayah rasuah dan salah guna kuasa dalam kalangan kontraktor lantikan MPS. MPS berharap program seperti ini dapat memberikan kesedaran kepada para peserta selain menyampaikan maklumat antirasuah secara berterusan.

#TAMAT#

Dikeluarkan Oleh:

Bahagian Perhubungan Awam
Jabatan Korporat

b.p. **Yang Dipertua**
Majlis Perbandaran Selayang
23 Mei 2023